

共同經課 - 1 創世記十五章一節~十二節, 十七節~十八節

1 Chiah-ê tã-chì 了後, 耶和華 ê 話 tī 異象中臨到亞伯蘭, 講, 亞伯蘭 ah, 你 m̄ 免驚, 我是你 ê 藤牌, 是你極大 ê 報賞。2 亞伯蘭講, 主耶和華 ah, 你 beh hō 我甚麼, 我已經無 kiáⁿ; 承接我 ê 家業 ê, 就是大馬色人 Í-lī-i-siá? 3 亞伯蘭 koh 講, 你無 hō 我有後裔, hit-ê 生 tī 我家內 ê 是我 ê 後嗣。4 耶和華 koh 臨到, kā 伊講, Chit 人 m̄ 是 beh 做你 ê 後嗣; 對你本身出 ê, chiah 是做你 ê 後嗣。5 就 choā 伊出去外面講, 你看天, 算 hiah-ê 星, 你算能了 á-boē; koh 對伊講, 你 ê 後裔亦 beh 親像 án-ni。6 亞伯蘭信耶和華; 伊就 kā 伊算做義。7 Koh 對伊講, 我是耶和華, bat choā 你出 Ka-lèk-tí ê Jíⁿ 城, 爲 tiòh beh 將 chit-ê 地 hō 你做業。8 亞伯蘭講, 主耶和華 ah, 我怎樣會知 beh 得 tiòh chit-ê 地做業 ah? 9 伊 kā 伊講, 你 kā 我取一隻三年母 ê 牛, 一隻三年母 ê 山羊, 一隻三年公 ê 綿羊, 一隻 ka-chui, 一隻 鴿 á。10 伊就取 chiah-ê 物來, tàk 樣 tùi 中破開做兩 pêng, chit-pêng kap hit-pêng 排相對; 只有鳥無破開。11 有鷹鳥落來 tī 死 ê cheng-siⁿ ê 頂面; 亞伯蘭就趕伊去。12 日 beh 落 ê 時, 亞伯蘭睏重眠; 忽然有真鳥暗 ê 大驚惶到 tī 伊。17 日落天暗, 有出煙 ê 爐, kap teh-tòh ê 火把, tùi hiah-ê 破 pêng ê 肉經過。18 當 hit 日, 耶和華 kap 亞伯蘭立約, 講, 我有將 chit-ê 地, tùi 埃及河到 hit-ê 大河, 就是 Pek-lat 河, hō 你 ê 後裔;

共同經課 - 2 詩篇二十七篇

1 大衛 ê 詩。1) 耶和華是我 ê 光, 是我 ê 拯救; 我 beh kiaⁿ chī-chūi? 耶和華是我活命 ê 氣力; 我 beh kiaⁿ chī-chūi? 2 Hiah-ê 做 pháiⁿ ê 人, 就是我 ê 仇讎, 我 ê 對敵, 來攻擊我, beh 食我 ê 肉, Hit 時 in 就 tiòh-tak 跋倒。3 雖然有軍兵紮營, beh 攻擊我, 我 ê 心亦無驚惶; 雖然興起刀兵攻擊我, 我猶原自在。4 有一項事我 bat 對耶和華求, 我猶原致意 ài 得 tiòh; 就是一世人 khiā 起耶和華 ê 厝, 看伊 ê 榮光, sià 念伊 ê 殿。5 因爲患難 ê 日, 伊 beh 暗靜保護我 tī 伊 ê 帳帷內; 將我 khng tī 伊布棚蓋密 ê 所在; 舉起我 tī 石磐頂。6 Taⁿ 我 ê 頭殼得 tiòh kiáh 起, khah 高 tī 我四面 ê 對敵; 我 beh tī 伊 ê 布棚獻歡喜 ê 祭; 我 beh 吟詩, 亦 beh 唱歌 o-ló 耶和華。7 耶和華 ah, 我出聲求叫 ê 時, 求你聽; Koh 求你憐憫我, 應我。8 你 bat 講, Lín tiòh 欣慕見我 ê 面; hit 時我 ê 心 tùi 你講, 耶和華 ah, 我 beh 欣慕見你 ê 面。9 M̄-thang 對我掩你 ê 面; M̄-thang 受氣來趕你 ê 奴僕; 你平素是做我 ê 幫贊; 救我 ê 上帝 ah, m̄-thang 放 sak 我, 亦 m̄-thang 離開我。10 因爲父母離開我, 耶和華 beh 收留我。11 耶和華 ah, 求你用你 ê 道路指示我; 因爲我 ê 對敵 ê 緣故, choā 我 tī 平坦 ê 路。12 M̄-thang 將我交 hō 對敵, 成 in ê 心願; 因爲 lām-sám 干證 ê 人起來攻擊我, in 亦吐出兇惡 ê 話。13 我若 m̄ 信 tī 活人 ê 地得 tiòh 看見耶和華 ê 恩惠, 就的確絕望。14 Tiòh thèng 候耶和華, Tiòh 勇壯, 你 ê 心 tiòh 堅固; 實在 tiòh thèng 候耶和華。

共同經課 - 3 腓立比書三章十七節~四章一節

17 兄弟 ah, lín tiòh saⁿ-kap 學我; lín 有阮做模樣, 就 tiòh 致意看 hiah-ê 照 án-ni 行 ê。18 因爲有 choē-choē 人行 tã-chì, 是我 bat tàuh-tàuh kā lín 講, taⁿ 也流目屎 kā lín 講 ê, in 就是基督十字架 ê 對敵; 19 in ê 結局是沉淪, in ê 上帝是 in ê 腹肚, in ê 榮光是 tī in ê 見笑, in 所致志是地上 ê 事。20 因爲咱是天頂 ê 國民, 也 òng 望拯救 ê tùi hia 來, 就是主耶穌基督; 21 伊既然有權能會 hō 萬物降服伊本身, 就 beh 用 hit-ê 權能來變換咱卑賤 ê 身軀, kap 伊榮光 ê 身軀同款。1 所以我所疼所欣慕 ê 兄弟, 做我 ê 歡喜, 做我 ê 冕旒 ê, 所疼 ê ah, tiòh án-ni khiā 在 tī 主。

共同經課 - 4 路加福音十三章三十一節~三十五節

31 Hit 時有法利賽幾 nā 人來 kā 伊講, 你 tiòh 離開 chia 去別位, 因爲希律 ài beh thài 你。32 伊 kā in 講, lín 去 kā hitchiah 狐狸講, 你看, 今 á 日, 明 á 日我趕鬼醫病, 到第三日我就完全。33 雖然 án-ni, 今 á 日, 明 á 日 kap 後日我應該 tiòh 行; 因爲不該有先知受害死 tī 耶路撒冷 ê 外面。34 耶路撒冷 ah, 耶路撒冷 ah, 就是 thài 死先知人, 用石頭 tím 奉差到 tī 伊 ê, 我 joā choe 7pai2 ài 聚集你 ê Kiáⁿ 兒, 親像雞母聚集伊 ê 雞 á tī 翼下; 但是 lín m̄ ài。35 你看, lín ê 厝放 teh hō lín; koh 我 kā lín 講, Lín 決斷 boē 看見我, thèng 候 lín 講, Tī 主 ê 名來 ê 得 tiòh 福氣。